

四庫全書

集部

欽定四庫全書

集部

御定歷代賦彙卷六

詳校官檢討臣劉忻

主事銜臣徐以坤覆勘

總校官編修臣王燕緒

校對官中書臣陸湘

膳錄監生臣史映綵

欽定四庫全書

御定歷代賦彙卷六

天象

明河賦

唐

謝偃

月初回於夕陽日夜沒於天網步庭砌以游行覺雲霄  
之杳茫氣象萬殊緬星河而盡列光輝一道羅銀漢之  
靈長徒觀其繁兮如磋潔兮如磨明月照而不失其素  
飄風驚而匪揚其波莫測其深含天際之四氣莫度其

遠掩人間之衆河及夫歲入三秋勢直千里度龍駕而容曳構鵲橋而迤邐霞妝星靨知嫠女之不如雜珮明珠必姮娥之相似七夕作之以良會羣方於是而仰止固能流不可準涯不可度既莫見乎端倪亦焉知其厚薄夫其為謙也太陽曜而不爭其光夫其為德也巨海枯而莫之能涸奪凝霜之漫漫方白石之鑿鑿居崇高而不危體虛無而自若名連地脈影雜天文當霽夕而逾曉凝微雨以暫曛明白可稱則皓如曳練正平可緝

亦矗似長雲亘紫極以斜轉橫碧空而中分吐霄光而  
澹澹含曙色而氤氲將欲問之於槎客如何欲決於嚴  
君

秋河賦

唐張環

倬彼昭回鑿天而開含秋耿耿積曙皚皚水清淺而不  
落光逶迤而屢迴非碧海之分上即黃河之轉來萬里  
直繩九霄橫帶奕奕高影湯湯連瀨透垂簾於戶前飛  
瀑布於雲外黯如平江不動矗似長雲欲銷映東吳而

寫練挂南斗而成橋氣象晶明波瀾瀕洞泛濫星點紆  
餘月美界黃道而宵迎落青山而曉送雖滔天而作限  
乃沃日而為節識示盈而必謙恒昏凝而晝滅亦猶靈  
烏之謝顧兔之缺適足明其舒卷夫何累乎昭晰於是  
張平子仰而歎曰此何靈輝若有若微杳杳迴薄茫茫  
是非鵲填銀而何去人取石而何依乘槎之子兮上不  
上弄杼之女兮歸不歸坐迴遑而曉失空白露兮霑衣

天河賦

以天空色際寧  
見浮槎為韻

唐盧肇

惟天有河是生水德凌浩渺之元氣挂崢嶸之遠色所以正辰極奠南北其清莫挹濯星斗以滋上玄其惡可流蕩雲霓以臨下國赫赫融融自西自東沿大象而其源不竭橫終古而其運無窮磅礴九霄浸潤豈沾於土宇輕清一氣波瀾寧動於天風匪蕩蕩而就下但耿耿而浮空處晝則潛由昏則見俟良夜之延矚故高明而自擅光連月窟何慙媚以懷珠影照天津豈愧淨而如練至若白榆風勁析木煙秋吹玉葉而將落泛金波而

共流皎晶無際闌干自浮渡蟾魄之孤輪不聞濡軌漲  
鵲橋之遠岸詎見操舟莫議高深孰能揭厲演漾必滋  
於若水氤氲更襲於丹桂映蒼天而漸出想積石於河  
源拂遠樹以將低誤一葦於天際遙思濯手遠憶乘槎  
流合璧之輝幾疑沉玉映散金之氣或類披沙辨牛豈  
見其津涘聞難遽隱於雲霞是宜以河之名居天之大  
閣道蛇橫於曲渚驪珠蚌剖乎淺瀨源流自遠清無可  
羨之魚分野甚明皎若誓封之帶鑿自太古疎於圓靈



奔注肯隨於川瀆高明自貫於日星夫其濟黃道決青  
冥陰地軸灑天經悠矣久矣配吾君之永寧

曙觀秋河賦

以寥天晚清景  
耀昭晰為韻

唐

王損之

邈彼斜漢麗於中天遇良宵之已艾與清景而相鮮勢  
則昭回既闌干而遠映時方蕭瑟亦汎濫而高懸的爾  
遙分淒然仰眺澄奕奕之浮彩隱蒼蒼而引耀孤星迴  
泛狀清淺之沉珠殘月斜臨似滄浪之垂釣輕暉幕幕  
遠景蕭蕭色分隱映光凝沱寥疑瀑布而不落似輕雲

之欲銷夜景將分清光向曉縈碧落以迴薄澹晴空而  
縹緲躋攀不及限一水以心遙瞻望空勞邈九霄而思  
杳發跡無隘凌虛不傾積曙色之牢落涵爽氣之淒清  
疑曳練而勢遠訝殘虹而體輕遠想牽牛漸失迢迢之  
狀遙思美杼無聞軋軋之聲景氣潛昭氛埃遠屏寧在  
地以為狀信滔天而挂影可以翫清光狎餘景分暉爽  
亮向曉色而亭亭遠勢縱橫帶秋光之耿耿偉茲垂象  
倬彼青霄映星躔之的的出雲路以昭昭想穿鑿之初

悠然莫測稽源流之始邈矣方遙則知匪自人功實惟  
天設自虛無而想像界寥廓而昭晰意天邊之橫注遠  
若波瀾想空裏之潛流遙疑鳴咽宜其臨清泚挹澄澈  
儻天路之可昇與清漪而比潔

雲賦

周  
荀卿

有物於此居則周靜致下動則綦高以鉅圓者中規方  
者中矩大參天地德厚堯禹精微乎毫毛而充盈乎大  
寓忽兮其極之遠也攝兮其相逐而反也印印兮天下

之咸塞也德厚而不損五采備而成文往來惛憊通於大神出入甚極莫知其門天下失之則滅得之則存弟子不敏此之願陳君子設詞請測意之曰此夫大而不塞者與充盈大寓而不窕入却穴而不偏者與行遠疾速而不可託迹者與往來惛憊而不可為固塞者與暴而殺傷而不億忌者與功被天下而不私置者與託地而游寓友風而子雨冬日作寒夏日作暑廣大精神請歸之雲

雲賦

晉楊乂

天地定位淳和肇分剛柔初降陰陽烟煴於是山澤通  
氣華岱興雲縹緲翩綿鬱若升煙蹇槃縈以詰屈兮若  
蚪龍之蟠蜿嶷岐岐以岳立兮狀有似乎列仙東西絡  
繹南北油裔隨風徘徊流行晻靄豁兮仰披杳兮四會  
凝寒氷於朱夏飛素雪於玄冥灑膏液於天漢騰鴻泉  
於太清乾坤以之交泰品物以之流形江海以之深滿  
川谷以之豐盈毛羽以之光澤草木以之葩榮萌芽以

之挺殖苗秀以之積成始於觸石而出膚寸而征終於  
霑濡六合浸潤羣生蕩滌陳穢含吐嘉祥施暢凱風惠  
加春陽擬神化於后土與三曜兮齊光

白雲賦

晉  
陸機

攄神景於八幽合洪化乎烟燭充宇宙以播象協元氣  
而齊勳發憤靈石擢性洪流興曜曾泉升跡融丘盈八  
紘以餘憤雖彌天其未泄豈假期於遷晷遇崇朝而倏  
忽紅蕊發而菑萑金翹援而合葩神收鬼化弼性違序

鳥殊類而比栖獸異跡而同處蛟引翳而竝潛龍攀鴻而雙  
舉鸞舞角以軒罷鷺企翮而延佇長城曲蜿蜒采閣相扶聳瑤  
臺之截薛構瓊闥之離婁雄虹矯而垂天翠鳥軒而扶日

雲賦

明  
朱同

客有指白雲而問於主人者曰山澤之隈滄海之湫滯  
然而升氣虛以浮不足而行委蛇而風與水為偕匪蛟  
匪龍油然而興伊誰蒸之沛然而雨伊誰注之御空而  
遊誰其負之卷海而翻誰其怒之八表同昏誰其屯之

一色晴昊又誰埽之乘風而馳姬滿之八駿不能追也凝然而止劉秀之六軍不能擬也填山隘谷風雨淒淒當是時也大塊一氣不知端倪恍然霽止乾呈坤露於斯時也鳳翥鸞翔奇峰羅布映日而霞孰染其丹凝寒而霰孰結其丸變化俄頃不知其端若是者懸河之口長虹之筆不得而殫也子盍為我言之主人笑而應之曰子獨不見夫水乎一泓之水一勺之多澄之為鏡撓之為波渥者思飲垢者思滌淵之而清激之而白是豈



足以盡夫水之迹哉迨夫天地之茫洋北溟之浩蕩浸  
日月而不以為深載山岳而不以為廣鷗鵬之所不至  
而舟楫之所不嚮百川注之而不溢尾閭洩之而不竭  
颶風振之而不搖太陽沸之而不熱是以窮天地亘萬  
古而不能磨滅者也而雲實祖之子又不見夫風乎薰  
然南來百卉斯茂淒其西至悉斯以皴大王斯民有雌  
有雄威發和暢有春有冬若是者豈足以盡夫風哉爾  
乃細入無內大充無限吸之而寒噓之而溫蓬然而起

馳乎八極寂然而止不見其迹禦寇之所御大鵬之所搏冷然而往倏然而還是其浩然而充乎兩間者也而雲實乘之且夫太陽之精其亘千里緯天而行周而成歲一北一南一寒一暑歲月日時由茲以起萬物之生成二氣之降升咸由於是爾乃入昧谷淪幽都載大地於一周出扶桑之東隅蒸水氣而上征浮沆瀣於太虛此雲之所以出渤澥起山谷而昇天衢也請觀夫五岳之巔四瀆之瀆水無日而不降雲無旦而不興恍惚變

化糾錯紛紜果孰宰而孰君之邪其有濟於人也則為  
祥為慶時雨甘霖其有害於人也則為癡為瘴曰災曰  
淫而雲亦何嘗容心哉言未既容矍然而起長跪而謝  
曰往者徒覩其形未究其理子發吾蒙至矣盡矣主人  
曰未也請為子歌之歌曰水為父兮風為馬太陽蒸兮  
九之野出大壑兮浮蒼天沛然而降兮油然而升去不  
知所歸兮來不知所為倏而合兮忽而離乘吾車兮高  
翔駕白螭兮騁鳳凰豐隆先驅兮應龍馭與爾遊兮帝

之鄉

白雲無心賦

以山川出雲天  
實為之為韻

唐

韋執中

英英白雲合莫為質義則難究覽之不一觀其發雖有  
類於知機稽其理乃無心而自出蓋玄造之潛運而神  
功之陰臨時止時行或徐或疾結自元氣生乎羣山將  
離兮孰制而合既往兮孰召而還非欲恢弘自覆乎大  
荒之際焉知酌損不踰於膚寸之間徒見其紆餘上漢  
繚繞飛天形不常而屢易居靡定而頻遷謂變通之不

倦將有志於必然斯乃生有於無假虛為實勢乍分於  
逐火色暫渝於帶日油油裔裔雖在空而可觀杳杳冥  
冥考攸往而無必觸石蒼野揚埃白泉不恒厥所有開  
必先搖颺縈空滅煙光於遠嶠輪囷委地雜波景於遙  
川氤氲氤氲或聚或分其散也氣其興也雲忽羨溢以  
洪舒若練之曳乍縈紆而交錯如絲之棼所謂化於無  
象著於無為匪知咎於進退惟契道而推移夕隨重陰  
則黯以霏霽晝混陽景則煥然赫曦歛上騰而翳蔚俄

疊影以參差既有遇而必變則無心兮可知然則陰陽  
不測天實為之不然者雷何憑而隱隱雨何施而祁祁  
雖思慮而不假何卷舒以應時儻帝鄉之可陟何自致  
兮在茲

白雲無心賦

以山川出雲天  
實為之為韻

唐

闕名

觸石起於膚寸散遠天以逶迤既輪囷而合道澹搖曳  
以無為綴廣莫以霜淨凝太虛以纓垂出處靡恒同至  
人之無著卷舒罔究類君子之不羈翹玉葉以繚繞耀

金柯而陸離其兆無質其形罕一匪潤礎以上昇或從  
龍而迴出入房星貺偶作瑞於殷王登封效祥諒無情  
於漢室影搖連於遠水光俯接於平川幾徘徊以暫散  
倏迤邐而相連分至必書驗其物而有則荆棘不別表  
茲性之無偏勢出塞以繽紛色瑩空以氤氲被漫漫之  
精氣成英英之白雲抱翠石以流彩入清池而寫文或  
假勢於重嶺或隔闕於孤山挺奇峰於天末亘橫陣於  
巖間順細雨以低舉隨輕風而往還哂魚鱗之覆地輕

鵬翼以垂天誠莫察其所感亦安知其所然五色競彰  
我則匪黃匪黑五方皆遍我則何後何先至矣哉信潔  
白之無心實數華之不實雲之容兮或明或暗雲之體  
兮乍徐乍疾唐堯沉璧而受釐軒后紀官而修吉異哉  
近遠相追紆餘歲挺出蒼梧以漠漠入帝鄉以遲遲媿  
作凌雲之賦思歌出谷之詩儻賢良以見舉庶微才以  
應之

白雲照春海賦

以解碧空鏡  
春海為韻

唐  
姜公輔



白雲溶溶搖曳乎春海之中紛紜層漢皎潔長空細影  
參差匝微明於日域輕文燐亂分炯晃於仙宮始而乾  
門闢陽光積乃縹緲以從龍遂輕盈而拂石出窮巖以  
高翥跨橫海而遠撫故海映雲而自春雲照海而生白  
或杲杲以積素或沉沉以凝碧圓虛乍啟均瑞色而周  
流蜃氣初收與清光而激射雲信無心而舒卷海寧有  
志於潮汐彼則澄源紀地此乃泛跡流天影觸浪以時  
動形隨風而屢遷入洪波而竝曜對綠水而相鮮時惟

孤嶼冰朗長汀雲淨辨宮闕於三山總妍華於一鏡臨  
瓊樹而昭晰覆瑤臺而縈映鳥頡頏以追飛魚從容以  
涵泳莫不各得其適咸悅乎性登夫夾嶮望茲雲海雲  
則連錦霞以離披海則蓄玫瑰之翠彩色莫尚乎潔白  
歲何芳於首春惟春色也嘉夫藻麗惟白雲也賞以清  
貞可臨流於是日縱觀美於斯辰彼美之子顧曰無倫  
揚桂檝耀青蘋心遥遥於極浦望遠遠乎通津雲兮片  
玉之人

白雲起封中賦

以皇漢施德介  
丘告成為韻

唐

高孚

客有遭逢漢昌從武帝而登岱觀白雲之效祥曰此蓋  
非常不飄不揚初起封中方郁郁以呈象稍浮山上乍  
英英而有光原初出之義也告成我皇我皇德以靜人  
威以平難廓清諸夏光啟大漢俗既和兮考時巡禮既  
備兮登日觀惟天輔聖無雨則其明徵惟岳通玄出雲  
所以幽贊不然者山有四岳胡獨興於此地有四極胡  
不晉而施觀耀質以流彩若無心而有知無心者何隨

車而動息有知者何表聖之功德帝穆清以修祠雲故清其容帝貞白以為心雲故白其色豈徒然也君為萬國所仰岳乃衆雲所屆其垂思儲精登封俯拜亦庶乎明神斯答景福攸介故夫是雲也乘元氣而出冠靈壇而浮不漠漠以四散直亭亭於上頭祥光內朗瑞色旁流既表慶於茲日復增華於介丘此可以見其無疆之休者也且夫刻石者所以紀號泥金者所以昭告必玄德之已升乃茲山之可造若齊桓僭侈秦帝驕暴縱傾

國以修封豈嘉祥之云報美矣哉晝日斯清瑞雲孔明  
綢繆蕭索下應一人之感髣髴影響旁聞萬歲之聲彼  
入房彰於殷帝浮河表於周成豈可與茲而名哉

山川出雲賦

以維岳降神生  
甫及申為韻

唐

李曾

天地為大不能獨生山川通氣然後化成故雲者氣也  
感時而先出雨者施也憑雲而後行亦由將有邦家神  
必生其賢智獲其輔佐化乃洽於文明且觸石爰分陵  
空可覩雜峰巒而勢逸奇狀掩山川而氣騰雄怒變而

可大隨風散以飛揚用而有成從龍作為霖雨因知雲之將出合君臣之道賢之將來為帝王之輔所以神致命於開周岳降神而生甫者矣天不我欺雲出以時濟旱災而有望播膏澤而無私則臣既在茲君當以維黃彩有豐年之驗青光表舉賢之期豈獨郁郁紛紛合嘉氣以成慶朝朝暮暮向陽臺而有思其為體也且多其為狀也難及舒則杳冥而無際卷則涓液而竝入況至帝鄉而散城邑隨蓋狀以徐轉對陣影而遙集君無謂

輕虛而不真君無謂悠揚而不親有以通天地而為化  
有以合陰陽之至神與道興滅隨時屈伸為君重陰覆  
萬人於炎暑為君載雨滌四海之埃塵蔽虧窮巷遶山  
扉以升降迴旋翠幄拂仙家而繇邈應賢為瑞願浮色  
於落川改容非煙冀騰光於崑岳

五色卿雲賦

以題為韻

唐

李惲

惟皇建極兮憲章前古於穆文明兮保乂寰宇御時得  
一兮臨人以五法天無私兮承天之祐至矣哉衆兆融

朗山川出雲叶千年之休裕垂五色之氤氲蕭索離披  
狀虹輝之貫日徘徊摇曳疑鼎氣之歆汾散作霞彩聚  
成錦文匪騰華於觸石信呈瑞於明君其靜也專其動  
也直既無散漫亦無消息遠而可視高未能逼乘輕吹  
之霏微映朝陽而翕艷稟造化之元氣擬自然之奇色  
英倏倏也祇可以理求紛溶溶兮固難乎智測若霧非  
霧有始有極轉空不待於扶搖動日豈資於羽翼有道  
斯見無德匪呈庶物皆覩應天之御體鵠振而超越候



龍吟而化成則需為大矣可謂乎元亨利貞

五色御雲賦

以題為韻

唐闕名

於穆聖唐建其皇極通三微而昊穹降祉禔萬福兮陰陽不測答禧祥於一人見彩雲之五色其為狀也乃從龍以分氣其為勢也若搏鵬之垂翼蒼蔚非觸石而興縹緲盈畫工之飾蔥翠炯晃蕭索氛氲迴合斐疊散聚分文轉光風則動而愈出衝霽日則燦然皆分古之函關紫氣帝鄉白雲豈比澄鮮流慶作瑞吾君夫德施者

帝王之所崇雲行者天地之所溥惟帝德之動天諒卿  
雲之飛吐光浮碧落奪虹彩於太虛影下清潭照錦色  
於曲浦將以發揮明時騰邁前古雖建官惟賢列爵惟  
五降及品彙莫不是覩緬彼瑞牒詢夫物名則有甘露  
降黃河清狐九尾而來擾草三秀而敷榮若以匹敵莫  
之與京式昭聖理承應天卿是乃感壽以呈休應君以  
來附苟非至道則未期遇故漢主之祠后土也寶鼎見  
兮其色同昭軒轅之誅蚩尤也華蓋蒙兮一形乃拊佳

衆聖於往昔亦效祉而斯覩式贊其翰恭命述賦

五色雲賦

明屠隆

五月既望遵湖而西驅車高原飲馬空陂娟娟者湖秀  
絕而孤繇亘千里映帶城隅沙長水明沉鷗浴鳧青蒲  
照人綠波平鋪乃稅駕於河漣弔昔賢之遺迹余欽斯  
人兮高曠俯太湖而歎息歎息自天俛仰今古何彼卿  
雲爛焉以巨迴合朗映曠日微吐蔽天者半厥色惟五  
厥狀瑰麗玄黃雜組或如玄圭或如白珂或如靈雲之或

如玉禾或如絳綃或如紫紵或如文杏之葉或如含桃  
之顙或如秋原之草或如春湘之波澹修眉之連蜷呈  
冶態而婀娜又如萬花競開百鳥齊飛奇姿窈窕秀色  
離披威鳳之彩葳蕤錦雞之翼差池肩肩霏霏纚纚  
襍紛乎若纈蠹乎若髭又如仙人製錦借色雲君濯彼  
天河五彩成文丹霞失麗明星載昏長天紺碧遙光深  
靚羣山並朗回浦獨映芙蓉相鮮下爍紫葍大物矜炫  
變幻靡窮乍散乍合若澹若濃廓乎若啟宵兮若濛嗟

此璀璨雕彼太素神乎巧哉天孫所妒何文章之綺靡  
恐大帝之是怒疇驅真宰泄祕抽玄東壁獻圖丹甲命  
篇揆河漢以布彩走五星於毫端振藻耀日鴻思寫天  
曄妖虹而直上捫列缺而倒懸洵天章之巨麗何人工  
之能為相如么麼子雲無奇錦心莫吐彩筆藏輝雕龍  
刻鳳之技黼黻藻火之形莫不銷其文彩遁其精靈金  
闕洞開高敞玉樓丹青錯落棟宇雕鏤閣道玲瓏列仙  
出游引以琬輿夾以華輶霞裾成削環珮相糾紛朱幢

而建紫蓋嵌七寶而雜琳球朗焉翕絕六合精熒繪山川絢日星掩關門之紫氣奪霞標於赤城有爛其光曄曄其英王母之所不能謠羣臣之所不能賡是誠乾坤之上瑞兆國家之文明若焉神爽悅矣骨驚余安得躡層雲而上馳下覩大地之與蓬瀛聊申意於斯文悵獨立而屏營

郊天日五色祥雲賦

以題為韻

唐元稹

臣奉某日詔書曰惟元祀月正之三日將有事於南郊

直端門而云出天錫余以雲瑞是何祥而何吉臣稹稽  
首敢言其實陛下乘五位而出震迎五帝以郊天五方  
騰其瑞氣故雲五色以相宣排空乍直捧日初圓獸蹲  
而龍鱗熠熠鳥跂而鳳翼翩翩羽蓋凝而軒皇暫駐風  
馬駕而王母欲前影帶其彩疑錯繡之遙屬光照乎物  
比摛錦之相連觀之者無小無大觀之日非煙若煙昔  
者卿雲作歌於虞舜白雲著詞於漢武皆跂望而為言  
非仰觀而遂覩今陛下德至天地恩覃草莽當翠輦黃

屋之方行見金枝玉葉之可數陋泰山之觸石方出鄙  
高唐之舉袂如舞昭示於公侯卿士莫不稱萬歲者三  
竝美於麟鳳龜龍可以與四靈為五於是載筆氏書百辟  
之詞曰郁郁紛紛維慶霄之雲古之堯舜幸得以為君象  
胥氏譯四夷之歌曰煒煒煌煌天子之祥唐有神聖莫敢  
不來王帝用愀然曰予何力澤未周於四海雲胡為乎  
五色來爾羣后舉爾衆職因五行以修五事遵五常而  
厚五德正五刑以去五虐繁五稼而除五賊苟順夫人



理之父子君臣則安知雲物之赤黃蒼黑進我輦輅就  
我鈞陶雖有光華之萬狀不若豐穰於四郊凡百庶僚  
相趨而顧稍疑江上之奇果異封中之素補天者維欲  
抑之而不出簪筆者安可寢之而無賦越明日臣稹詠  
霈澤於雞竿之前覩斯雲散之為五彩之湛露

早秋望海上五色雲賦

以餘霞散  
成綺為韻

唐張何

夫幽棲多暇樂道閑居坐文章之苑圃放精思以畋漁  
詠太冲之招隱諷相如之子虛觀蘭凋而蕙歇傷夏卷

而秋舒昇重軒以徙倚目平海而踟躕見五雲之間出  
繞三山而忽諸映烏晶之曠朗涵蜃氣之紆餘光泛泛  
而逾淨影離離而不疎懿夫騰碧海瑞皇家金柯玉葉  
兼雜花文璀璨光紛華況夫羅幃錦帳繞香車雙虹宛  
轉縈翠霞及夫倏而聚忽而散霓裳羽旆相陵亂倚長  
空浮迴岸宛若瓊樓金闕橫天半美人濯錦春江畔既  
而叢彩可望奇狀難名羣象糾紛疑綺羅之繡出五色  
明媚若丹青之畫成影沉波而海晏氣羃岫而山晴嗤

碣嶺之光淺恥汾川之色輕壯瑞圖之舊錄應樂府之  
新聲似帝鄉之迢遞冀有司而見行悠悠帝國三千里  
不託先容誰銜美希君顧盼當及時無使霏微散成綺

### 春雲賦

宋田錫

玉琯春迴金門暖來柔先變柳繁已飄梅悅風和之日  
至賞雲彩之朝隲其初升也穠蒼蔚兮其少進也澹怡  
融兮依然然方觸類以多曙藹藹然若含情而自迷有  
時散作雨飛春寒慘慘有時亂和煙起春陰淒淒或蒼

梧南北或夢澤東西或樊川與輞川或吳谿與越谿或  
宿林園隨竹陰以籠徑或沉村落伴桃花而滿溪或初  
初出關或溶溶映水或北渚縈住或東風吹起或湧如  
波駭積芳野兮千里或曳若練舒橫碧天之半里江中  
令醉吟不足高閣閑登王仲宣遠望有餘危樓獨倚疊  
疊連根磷磷淺丈千狀萬態山陰水濱當青麥燕飛野  
色朝淨或平蕪雉過韶陽夕曛挂古木之橫枝纖纖欲  
斷覆孤村之半路融薄將分旭日未高晴天尚早幾片

明滅兮殘雪方消一脈輕鮮兮愁蛾澹掃上國美景五  
陵勝道覆梁王之水榭下繞落花映韓嫣之金丸遠沉  
芳草澹澹霏霏涵凝麗輝漠漠依依舒遲翠微野態不  
定幽容且奇浮澤國之嶺頭閑傷斷夢生蘇門之席上  
想滿僊衣或漢世故宮雀喧空屋或梁朝古寺水映疎  
籬或阮籍嘯臺雨吹半日或嚴陵釣石鳥立多時或桑  
乾戰場平沙渺莽或板塗永巷羣閣參差佇立閑望纏  
繚動思想觸石以初起旋浮空而散馳塞遙而歸雁相

逐天闊而殘霞共飛餘態遺妍思得杜陵畫品含毫寫  
景詎徵楚澤芳詞

夏雲賦

唐  
劉元淑

崇山作鎮我我秀絕暑氣潛蒸夏雲孤洩其稍進也間  
古木以深沉其上升也鏤太陽而明滅其質散漫其光  
氛氲抱翠石而留影入明水以寫丈粲粲爛爛摩太虛  
而歷漢郁郁紛紛從皓景而橫汾美其任運高下與時  
消息似大道之無心同達人之有識時康則應伴雨足

於一旬主聖乃浮變歌聲於五色俄頃萬里不資天地  
之功膚寸九霄豈假陰陽之力爾乃含精飄揚逐吹低  
舉周游散適不常其所出塞邈迤暮為陰山之陣入夢  
嬋娟朝是陽臺之女別有孤陋沉淪文章日新既作凌  
雲之賦未為天子之臣

夏雲多奇峰賦

明錢文薦

客有依樹而息影臨流而賦詩者會追河朔遊擬南皮  
碧沼暑退玉壺冰隨羽觴罷舉紉扇停揮聊移遠目忽

觀靈竒於時似煙非煙如霧非霧網緼而起菴藹而聚  
合體則一柱孤擎分狀則千巖悉具其為峰也高參霄  
漢遠亘天涯峭乃峩嶷空則豁豁或擢根而連杪或敷  
葉而帶葩或凌風而疊雪或映日而流霞著色淺澹布  
境幽遐紛紜競賞煜煜爭誇髣髴崑崙之五色依稀嵩  
少之三花至於綠蘿徑封青蓮煙吐窈窕難測嵯峨易  
覩誰將地肺倒挿天府驅遣豈鞭斲雕寧斧則有誤認  
王母之輦虛疑神女之臺香馥郁以猶在態輕盈而忽



來所以望氣者思寶鼎於汾水求仙者慕銀闕於蓬萊  
徒惜其殘暉欲收異彩將散高標半折連影中斷勢傾  
危其不支容黯黯以無見類舟覆矣悽惋同嶽顛兮眷  
戀無怪乎會心者猶注想而凝眸惜景者遂興咨而發  
歎也況其時值炎蒸氣乖潤濕倚崖樹槁縈岫苔澀雖  
仰天而頻望徒觸石而罕出儻乘龍以高飛庶施雨之  
徧及

秋雲似羅賦

以蘭亦堪  
采為韻

唐  
侯喜

雲之可觀時惟佩蘭映婺女而扇薄透姮娥而幔寒縹  
緲如畫霏微似殘乍逐乘槎之人訝駕裾遠曳每映銜  
蘆之雁謂燕幕遙看且曉霧如縠於今何在餘霞成綺  
須臾則改詎若我終日是似有時而待擬六銖而披拂  
伴仙女降衣臨七夕以輕盈助牽牛納采幕幕風引籠  
籠露涵染絳日而成倩映青空而似藍冰綃若無孰不  
比方而皆忝霓裳儻有誰謂裁縫而不堪吁嗟乎一言  
有以千秋只亦天網本疎春絲不敵今夕何夕是尋是

尺如可求斯服之無數

望雲物賦

以察微表象書  
物備年為韻

唐

陳正卿

天道昭著靈臺聳拔將治歷以明時必仰觀而俯察誰  
敢倣擾曾不範圍既七政以欽若亦四序而發揮寒暑  
有次啟閉相依彼疇人以視遠類君子之表微維人有  
令維天有兆道在乎觀法用不撓彼分至之復應生雲  
物以縹緲俾占望以聿書將豐災以是表夫其大觀在  
上南正是掌審仁和之景色候肅殺之氣象授時莫愆

行令靡爽舉祀物以昭報順禳祈之盼嚮若乃履端於緒以正厥初分職辨雲既明於周典申命出日載列於虞書舉春奉始積閏歸餘節候應乎寒燠政令隨乎慘舒是用敬授以崇祇祓將舉正以舉中寧不軌而不物豈唯中臺端立永望以肆將以見天地之心辨剛柔之位庶乎有典有則克明克類若夫春景載陽冬日已至望西成之平秩見南郊之敬致莫不參陰陽之則符璿玉之器審四時以成序察五雲而有備備用先天實惟

有年儻虛臺之可頌庶無忝乎周篇

勤政樓視朔觀雲物賦

以天地交泰萬唐  
國歡心為韻

彭朝曦

聖上以睿德昭宣宸衷告蠲靜以法地動而合天天何  
言哉每降鑒於明主君為政也亦仰觀乎上玄是以魯  
史薦書雲之典禮經徵視朔之篇於時寓縣昇平朝廷  
無事闢朱樓於曉日垂紫旒於空翠至誠必應果呈證  
聖之祥至感必通遂有效明之瑞乍異色而抱日或神  
光而覆地是知昊穹成命必在於昌期玄象著明詎違

於躔次萬國來朝十月之交時當陽數氣發陰爻晴色  
俯臨遠接黑龍之水清輝四散仍縈彩鳳之巢臣竊觀  
前代之君也居九重之深據四海之大遇皇天之陰隲  
屬當時之交泰則必急政理而不修唯昇平而是賴今  
陛下則不然體至道以得一播元精以吹萬發號施令  
必酌於故實垂範制法亦咨乎前憲古人云朔者蘇也  
陛下視之所以蘇息兆人雲者運也陛下觀之所以廣  
運明德人既蘇而寧靖德乃運而克塞猶儲精而谷神

尚克已而作則方將揚耿光於五聖布深仁於萬國三  
事大夫抃而同歡上言曰陛下敦本棄末圖易於難夫  
此視朔情深履端況式瞻於萬象將布政於千官固可  
軼緹油而播美藏金匱而不刊然聖上方以無為作慮  
不宰為心鼓元氣之橐調薰風之琴以致德撫御以大  
明照盛矣夫聖德若此豈為臣之所能謳吟

南至郊壇有司書雲物賦

以題為韻

唐崔立之

唯皇動天辨方正位稽大明於北陸郊上玄於南至五

夜祇肅載惟列祖之誠三日罔憊用表致齊之意於是  
乘法駕鳴和鸞玉漏聲曉金波影殘環衛儼以星拱簪  
裾列而雲攢備肅肅之盛禮咸濟濟於靈壇大呂雲門  
既六變而斯閱嘉粟旨酒感百神而具歡矧器用陶匏  
藉以包茅光逾泰時馨邁周郊朱火煬煙遠浮於華蓋  
玄酒明水近映乎長旂懿夫宇宙氛氲晴郊景曛宗伯  
司禮保章辨雲榮光燭於九野佳氣覆於六軍飄飄颺  
颺郁郁紛紛足以昭上帝瑞吾君時謂唐時歌卿雲之



五色德稱虞德詠南風之再薰是以惟聖惟壽可大可  
久既豐稔之足徵復災癘之何有既而旋天步迴象輿  
大孝是展皇情未攄將欲超羲軒於上古方淳樸於太  
初俾時和俗阜塗謠史書土階攸則而瓊室靡居且慮  
乎賢哲尚屈所以敦於雲物緬乎德化未覃所以郊於  
國南祈動植之攸濟匪娛樂而是甘然後景福來格無  
疆在茲笑竹宮之求應鄙宣室之受釐是以降哀矜之  
詔宣惻隱之慈布政施德逮惇與廢舉沉淪於是日庶

聞之於有司

南至郊祭司天奏雲物賦

以題為韻

唐

郭遵

惟肇祀於上玄必展禮於南至至者作候故用其吉辰  
南則嚮明故就於陽位蓋取諸吉土以父事天降皇車  
以盡敬奉蒼壁以告虔至誠遂通禎祥不能以自閔幽  
贊不昧雲物於是乎昭宣及夫盛禮既畢大駕言旋兆  
人仰觀於空際太史復奏於君前曰當此和煦靜無纖  
氛照耀兮天垂愛景霏微乎山出祥雲度青霄而匪徐

匪疾向丹闕而乍合乍分應乎一陽之始煥乎五彩之  
文氤氲搖曳去來無際望之雖曰崇朝慶之知其嗣歲  
誰謂其有葉本乎觸石而來誰謂其無心偏舒捧日之  
勢豈非夫表王者之殊祉答泰壇之親祭者也天子乃  
命百辟詔有司載筆以茲記事祝史叶其正辭國慶可  
徵寧虞於水旱年豐有待先詠其京坻自躋仁壽之域  
肯繼春秋之時且南正上言休徵無咎肯比夫觀臺之  
望將為備於雲物子月之祀陰陽始交豈比夫魯史所

紀候啓蟄而乃郊我禮踰舊我祥靡究望歲而知歲之  
禳祀天而受天之祐五雲八風之異寸眸遂占三百六  
旬之期一日可候不然者何以炳煥圖牒發揮草奏是  
知郊祀而漢武奚匹推歷而軒后懷慙照臨之明兮將  
日月並出覆載之廣兮與天地同參臣有覩盛儀而瞻  
瑞物願齊聖壽於終南

南至雲物賦

以題  
為韻

唐王諲

於赫至化時惟大君推歷比夫軒后授人齊乎放動北

風戒節南至司分驗律飛灰遙應乎懸炭登臺視祲必  
在乎書雲麗乎時方別色天斂殘氛星連珠而候曉日  
合璧而呈文衆瑞咸集禎祥薦至雲散黃光天浮喜氣  
金柯郁郁而蔽野玉葉飄飄而委地迴紀天表永無兵  
意災沴靡作罷札瘥之虞水旱不行詠京坻之事得此  
先甲還同漢日之觀報以豐年不假春秋之備於時帝  
在暘谷風后陪騶會玉帛而塗山有媿朝公卿而汾水  
懷慙佳氣從龍遙連渭北非煙拂日俯對終南懿聖壽

之與萬美皇道而超三保章告其符祉太史視其簪紱  
應子月兮生一陽奏黃鐘兮動萬物乃明南至者日極  
之數視雲物者歲占之故其在必書不愆常度慶瑞滿  
於圖牒獻納盈其府庫鳳凰下於玄都銅雀棲於溫樹  
調玉燭而陰陽變和撫黔首而時令大布日之方夕歲  
聿云暮才非瞽史未知天道之祥文似相如願獻凌雲  
之賦

秋晴曲江望太一納歸雲賦

以題中唐  
于為頤

喬潭

秦稱百二鎮為太一合杳橫空嶽岑蔽日豈瓌寶之攸  
產蓋雷雲之自出宜其密爾王甸雄茲帝京敗葉風輕  
高秋氣清時雨夕歇歸雲晚晴俯枕曲水前臨直城山  
半隱而半見雲乍低而乍傾其趣可賞而不極其容可  
狀而難名爾其沉陰始解靄靄初歸迴日猶重因風則  
飛其始也峨峨巍巍千巖萬嶺稠疊而相感其漸也紛  
紛霏霏齊童趙女並舞而垂衣忽天澄而地廓鬱氛氤  
於翠微別有容與之勢輕盈之狀日下空籠天邊引颺

始悠悠於綠野漸幕幕於青嶂洛川神女何以踰巫峽  
佳人不能上雖更僕而非久仍移景而堪望落日將曛  
山銜斷雲綠氣陰鬱嵐光氛氲橫截高巖驚數峰之頓  
失却臨幽石與殘雪而無分乃為歌曰節彼南山兮人  
所矚施此雲雨兮濟君欲信軌物之無僣奚百姓之不  
足徘徊不去乃賦歸雲之曲曰歸雲之狀兮不一歸雲  
之趣兮難儔雲不以朝晡而異賞士不以前後而異求  
誠在位之如是知夫鴻漸之高秋



日暮碧雲合賦

唐 宋 昱

夕望兮見碧雲之出岑過太液拂上林配藜四施掩映  
千尋混蒼蒼之正色垂漠漠之輕陰西陸月炫南山風  
落輕濃象似倏忽龍螭集高議之臺連寓直之閣亭亭  
廣陌異公子之飛蓋裔裔長空如美人之卷幕遂能不  
遠仙宅來游帝鄉無心而生自浮洛以徵瑞感化而動  
乃干呂而呈祥同君子之出處均至人之行藏故吾儕  
從政之暇觀此而一詠一觴已乎已乎余未始兮可量

者也

雲從龍賦

以聖主得  
賢臣為韻

唐趙隨

山川之氣曰雲寂爾虛無倏爾韜映雖無心而既出終  
有感而協慶鱗蟲之長曰龍道符於神德合於聖時變  
化而無極在陰陽而應令是知雲為佐龍為主龍無雲  
不可以陟煙霄雲無龍不可以降時雨始靄靄於山澤  
俄駸駸於天宇有若魚水相須君臣夾輔而已原夫或  
躍在泉道契玄默未始出岫時有通塞及夫順天地之

功贊生成之德吟空山而奮揚其狀觸幽石而翦勃其  
色然後蹈乎寥廓自彼南北何往而不濟何施而不得  
潤萬物豈待崇朝控千里繞踰瞬息故曰氣感則應有  
開必先臣良而聖主垂拱雲起而飛龍在天以類相從  
罕聞不合惟后作又孰曰非賢是以殷丁得其傳說吉  
甫佐於周宣品物咸泰寰海晏然則雲龍之義明矣君  
臣之道一焉於以辨物理於以通人倫運有智子事有  
因如羽翼之相假同股肱之相親則當今得賢共理豈

金定四庫全書  
卷六  
不冠前代之君臣

旱雲賦

漢賈誼

惟昊天之大旱予失精和之正理遙望白雲之蓬勃予  
滄滄澹澹而妄止運清濁之瀕洞兮正重沓而並起鬼  
隆崇以崔巍兮時彷彿而有似屈卷輪而中天兮象虎  
驚與龍駭相搏據而俱興兮妄儷倚而時有遂積聚而  
合沓兮相紛薄而慷慨若飛翔之從橫兮揚波怒而澎  
濤正雲布而雷動予相擊衝而破碎或竊電而四塞兮

誠若雨而不墜陰陽分而不得兮更惟貪婪而狼戾終  
風解而霧散兮遂陵遲而堵潰或深潛而閉藏兮爭離  
刺而並逝廓蕩蕩其若滌兮日昭昭而蕪穢隆盛暑而  
無聊兮煎砂石而爛熳陽風吸習而煊煊羣生悶懣而  
愁憤壘畝枯槁而失澤兮壤石相聚而為害農夫垂拱  
而無事兮釋其耰鉏而下涕悲疆畔之遭禍痛皇天之  
靡惠惜稚稼之早夭兮罹天災而不遂懷怨心而不能  
已兮竊託咎於在位獨不聞唐虞之積烈兮與三代之

風氣時俗殊而不還兮恐功久而壞敗何操行之不得  
兮政治失中而違節陰氣辟而留滯兮厭暴戾而沉沒  
嗟乎作孽大劇何辜於天恩澤弗宣嗇夫寡德羣生不  
福來何暴也去何躁也孽孽望之其可悼也僚兮慄兮  
以鬱悌兮念思白雲腸如結兮終怨不雨甚不仁兮布  
而不下甚不信兮白雲何懟奈何人兮

餘霞散成綺賦

以題為韻

唐

常充

試一望兮雲晚而山晴白日欲沒兮紅霞始生含江天

之霽潤籠煙景之虛明發光華而不定若組織之相成  
陽文陰漫乍合乍散離披晃朗錯雜陵亂麗雲日之幾  
重鋪綺繡之千段翻光倒景擢菡萏於湖中舒豔騰輝  
攢蟬蛸於天畔照萬象於晴初散寥天於日餘吐丹氣  
於青嶂為金光於碧虛越女浣紗恥鮮明之莫及巴姬  
濯錦慙光彩之不如攢紅散紫參差邈迤狀羣飛之鸞  
鳳類叢生之花蘼始一變而舒霞終一變而成綺當是  
時也則有才子去國遊人別家汎濫秋景徘徊霽華惜

賞心之日暮悵遊目於天涯積九秋之懷抱對茲夕之  
煙霞仰丹霄之愁斷想赤水之路賒能不沉吟徙倚卧  
坐興嗟况復雲景迴午蒼涼愁暮思攄懷以振藻返疑  
憂而失趣空吟謝客之詩遐想公孫之賦

秋霧賦

以輕散長空寒  
飛迴野為韻

唐

謝良輔

有物混成陰陽之精騰而為質晦而為名遊塵未足方  
其細纖縠不能揣其輕度水陵亂從風半散表銀山之  
美素色增鮮沐玄豹之姿奇文獨煥若乃暑退朱方時



惟白藏空濛大澤鬱郁崇岡始經夫少昊之野終遍於  
無何之鄉含草木而功大混山川而氣長浮我極浦霑  
我層穹如雨如霰自西自東倏而來比君子之道廣忽  
而逝侔至人之性空奚水土之同致俾陰陽之異觀秋  
何霧而不起霧何秋而不寒至德發祥雜非煙於北極  
皇居瑞聖侔佳氣於南端及夫丙火方馳騰蛇欲飛三  
辰被汨五星霏微道不虛行來集黃公之咒神其有感  
去解白登之圖則知因時舒卷與物動靜資於塊垤變

態俄頃興非塞望雄鳴之路不迷冒且有聞彥輔之天  
自迴露游兮月之下霞斂兮風之假俟一揚於飛塵同  
秋空於迴野

赤虹賦

有序

梁江淹

東南嶠外爰有九石之山乃紅壁十里青萼百仞苔滑  
臨水石險帶溪自非巫咸采藥羣帝上下者皆斂意焉  
於時夏蓮始舒春蓀未歇肅舲波渚緩棹汀潭正逢巖  
崖相照雨雲爛色俄而雄虹赫然暈光耀水偃塞山頂

鳥奕江湄迫而察之實雨日陰陽之氣信可觀也又憶  
昔登爐峰上手接白雲今行九石下親弄絳蛻二奇難  
并感而作賦曰

迤邐嵒礧兮太極之連山  
鰐鰭虎豹兮玉虺騰軒  
孟夏氤氲兮荷葉承蓮  
悵何意之容與兮冀暫緩此憂年失  
代上之異人遲山中之虛迹  
拔仙草於危峰鑄神丹於  
崩石眎鱸岫之吐翕看鼇梁之交積  
於是紫霧上河絳氛下漢  
白日照餘碧雲卷半殘雨  
蕭索光煙豔爛水學

金波石似瓊岸錯龜鱗之峻峻繞蛟色之漫漫俄而赤  
蜺電出蚴蚪神驤暖昧以變依稀不常非虛非實乍陰  
乍光艷赫山頂照燎水陽雖圖緯之有載曠代識而未  
逢既咨嗟而躑躅聊周流而從容想番禺之光野憶丹  
山之喬峰稟傳說之一星乘夏后之兩龍彼靈物之詎  
幾象火滅而山紅餘形可覽殘色未去耀姜蕤而在草  
映青蔥而結樹昏青苔於丹渚暖朱草於石路霞晃朗  
而下飛日通隴而上度俯形命之窘局哀時俗之不固

定赤烏之易遺乃鼎湖之可慕既以為駢髻四髦之駕  
方瞳一角之人帝臺北荒之際弇山西海之濱流沙之  
野析木之津雲或怪采煙或異鱗必雜虹蜺之氣陰陽  
之神焉

晴虹賦

唐閻朝隱

一陰一陽備藻績以成文章載清載濁挂天涯而臨地  
角生於氣立於空宛宛轉轉瞳瞳矐矐上下明媚表裏  
冲融洗奇光於暴雨留豔彩於飄風隱顯之情奚爾造

化之理何窮若乃碧嶂無雲清江息浪曲折異體低昂  
殊狀半出高岵疑蟾魄之孤生全入澄瀾若蛾眉之相  
向又乃綺牕遠闢錦帳斜褰髣髴天上依稀目前瞻兮  
曄兮既類丹山碧樹之重疊斷兮連兮又似美人綵女  
之嬋娟察之無涯究之無實光天地之大造保雲霄之  
元吉爰有下才或趨微秩其志寥寥其心慄慄體物無  
功著書有疾既蘊慙於明鏡載有閣於鴻筆

虹藏不見賦

以陰陽所陵故  
結狀之為韻

唐  
李處仁

虹在東方小雪而藏貫日之形莫覩彌天之象難詳居  
曖昧之中光而不耀入混茫之裏闇然而彰表天時而  
無失其候順寒暑而不愆於陽眇望遼夏窮覽洲渚邈  
不察其形容何以知其處所見飛梁之跨水髣髴猶疑  
望慶雲之在天依稀延佇豈不以晦明有日隱見有期  
寒節方來斯則潛雖伏矣清明如到終當出而見之閔  
乎渥彩蓄以雄姿類成文隱霧之日同衣錦褰裳之時  
眇眇天末悠悠雲路御座之祥不逢美人之號難遇冥

蒙向晦徒欲想其爛然杳靄藏輝孰能知其去故宛得  
啟閉之道以明天地之心憐彎環之挂空猶隔層碧思  
紆餘而飲井當阻重陰不測之狀難狀無形之形罔尋  
若夫風雲尚慘我則隱蔽而知藏陽氣未騰我則炫耀  
而不結亦有霞散成綺雲吐如繒曷若拖軒之名將順  
時而出沒迴館之勢每應候而升陵至哉終取貴於彩  
章亦何慙於小畜孕明於煙霧之際誰辨輝光混迹於  
沉埋之間難呈紛郁事同嘉遯道叶悠伏虹兮虹兮何



當灑其霖霖


虹賦

明鄭明選

慕光客卿問於守玄先生曰太空之中有異色焉五彩錯出爛於雲間每春見而秋藏必夕東而朝西跨泰清以下垂狀若暈而半圓橫萬里之飛梁度天帝與列仙其始出也依微未鮮忽焉絢麗丹碧亘天既上架乎碧落亦下吸於長川光陸離以的皪勢夭矯而蜿蜒已乃若明若滅若斷若連頃刻不見莫知其端此何物也孰

使之然守玄先生曰以子所言是名屈虹字以挈貳諡以蟬螭晦者為雌昭者為雄或言陽以陰脅或言陰受陽攻或言樞鎮所散或言兩日所衝其為物也憑玄雲以成質藉太陽而生輝蓋淫衰之互交匪陰陽之正妃故演孔徵毀譽之惑月令儆昏姻之廢風人以莫指示戒易傳以色親比義晝見則飲井於漢庭夜出則蔽月於晉季投玉堂而宮省亂貫白日而壯士斃金商識女子之祥廬陵表丈夫之異雖感應之殊科咸上天之沴

氣若夫飲劉釜而吐金感孔經而化玉斯齊東之野語  
非經史之實錄爾乃月維七八枯禾閔雨鞭陽石於南  
郊縱陰門於北渚土龍驤首而欲飛石燕鼓翼而思舞  
雷殷殷以出地雲祁祁而布野遭彼妒之中截鬱屯膏  
而不下耕夫愴於南疇饑婦號於中戶過皇天之至仁  
民傍徨而失所雖文章之可悅傷陰陽之太和幸光彩  
之易滅豈久于夫二儀世不察而競觀曾煜燿之幾何  
吾既鑒天地之消息子毋美其光華



御定歷代賦彙卷六

# 欽定四庫全書

集部

御定歷代賦彙卷七

詳校官檢討<sub>臣</sub>劉 忻

主事銜<sub>臣</sub>徐以坤覆勘

總校官編修<sub>臣</sub> 王燕緒

校對官中書<sub>臣</sub> 陸 湘

謄錄監生<sub>臣</sub> 史映綵

欽定四庫全書

御定歷代賦彙卷七

天象

風賦

周宋玉

楚襄王遊於蘭臺之宮宋玉景差侍有風颯然而至王  
乃披襟而當之曰快哉此風寡人所與庶人共者耶宋  
玉對曰此獨大王之風耳庶人安得而共之王曰夫風  
者天地之氣溥暢而至不擇貴賤高下而加焉今子獨

以為寡人之風豈有說乎宋玉對曰臣聞於師枳句來  
巢空穴來風其所託者然則風氣殊焉王曰夫風始安  
生哉宋玉對曰夫風生於地起於青蘋之末侵淫谿谷  
盛怒於土囊之口緣太山之阿舞於松柏之下飄忽溯  
滂激颺嫖怒聒聒雷聲迴穴錯迕慶石伐木梢殺林莽  
至其將衰也被麗披離衝孔動捷眴渙粲爛離散轉移  
故其清涼雄風則飄舉升降乘凌高城入於深宮邸華  
葉而振氣徘徊於桂椒之間翱翔於激水之上將擊笑

蓉之精獵蕙草離秦蘅槩新夷被萸楊迴穴衡陵蕭條  
衆芳然後徜徉中庭北上玉堂躋於羅幃經於洞房迺  
得為大王之風也故其風中人狀直慙悽慄清涼增  
歎清清泠泠愈病析醒發明耳目寧體使人此所謂大  
王之雄風也王曰善哉論事夫庶人之風豈可聞乎宋  
玉對曰夫庶人之風塤然起於窮巷之間堀堞揚塵勃  
鬱煩冤衝孔襲門動沙塤吹死灰駭溷濁揚腐餘邪薄  
入甕牖至於室廬故其風中人狀直噉溷鬱邑毆溫致



濕中心慘怛生病造熱中脣為胗得目為瞶啗齧嗽獲  
死生不卒此所謂庶人之雌風也

風賦

晉湛方生

有氣曰風出自幽冥蕭然而起寂爾而停雖宇宙之宏  
遠儵俄頃而屢經同神功於不疾等至道於無情胡馬  
感而增思風母殞而復生起慘冬之潛蟄達青春之勾  
萌因嚴霜以厲威順和澤以開榮故君德喻其靡草風  
人假以為名及其猛勢將奮屯雲結陰洪氣鬱怫殷雷

發音勃然鼓作拂高凌深天無澄景嶺無停林六鷗為  
之退飛萬竅為之哀吟亦有飄冷之氣不疾不徐颼颼  
微扇疊疊清舒王喬以之控鶴列子以之乘虛若乃春  
惠始和重褐初釋遨步蘭皋遊眄平陌響詠空嶺朗吟  
竹柏穆開林以流惠疎神襟以清滌軒濠梁之逸興暢  
方外之宜適

風賦

晉  
陸 沖

爰太玄之遐始惟浮沉之剖分詳乾坤之至德莫風氣

之獨尊配無形於大象化萬品於烟煴釋凝潤於黃壤  
降霈澤於蒼元生無常域潛無定棲擢昧聚發尋虛散  
歸肆六合以騁邁括毫毛而徘徊引沈性於未萌挫發  
形於已就宣剛柔之流化導四氣之靈候若乃祝融司  
節炎精赫奕斂朱脣而長嘯承音響而來薄猥熒熠以  
盈扉列纏緜以結幕九域蕩搖區宇揮霍

擬宋玉風賦

齊謝朓

起日域而搖落集桂宮而送清開翠帷之影藹響行珮

之輕鳴揚淮南之妙舞發齊后之妍聲下鴻池而蓮散  
上雀臺而雲生至於新虹明歲高月照秋晬儀迺豫沖  
想雲浮鄒馬之賓咸至申穆之醴已酬朝役登樓之詠  
夕引小山之謳厭朱邸之沉邃思輕舉而遠游驕驕之  
馬魚躍飄輦車而水流此乃大王之盛風也若夫子雲  
寂寞叔夜高張烟霞潤色荃萸結芳出幽磴而泉列入  
山戶而松涼眇神王於丘壑獨起遠於孤觴斯則幽人  
之風也

風賦

唐鄭礎隱

惟茲風之興寂獨玄妙而無形託萬物以成象隨八卦而立名大則宇宙普洽小則纖毫必經翕翕習習清清泠泠排春樹而如動帶秋蓬而似輕所以炎清順夏勁厲隨冬入金滕而彰聖道通蘭臺而表雌雄飄玉蕊於濃草零圭葉於衰桐候吳範於帷內御列子於空中爾乃下振方輿上飛圓蓋懷壯士之適秦悅高皇之還沛乍霍靡於衆卉時颼颼於叢籟若乃乘陵高迴出入幽

微搖寶釵於雲髻動環珮於羅衣飄游絲以陰映舞輕  
雪以零飛銅鳥迎而迴翼胡馬聽而思歸乍來復往有  
聲無象驚塵則白日晝昏卷霧則珠星夜朗蕭瑟長松  
之下嘹唳高樓之上送夕鼓而傳音埽晨鐘而成響出  
幽巷而搖拂擊華堂而清敞浸淫遷延散漫聯緜送清  
聲於琴上落細粉於牕前乍卷通天之霧時飄覆水之  
烟勃起則大木斯拔暫息則洪波肅然或動或靜時來  
歛失聆之兮有聞察之兮無質形乃虛無體兼散逸雖

金匱要略卷七  
含毫而搦管豈神仙之能述

雲上之仙風賦

梁  
陶弘景

縹緲遙裔亘碧海而颺朝霞凌青烟而薄天際出龍門而激水度蔥關以飛雪於是漢區動御月軌驚文浮虛入景登空汎雲一舉萬里曾不浹辰此列子有待之風也若乃緜括宇宙包絡天維周流八極迴還四時氣值節而動律位涉異而離箕徒見去來之緒莫測終始之期此太虛無為之風也

風不鳴條賦

以扇微和於五日之候為韻

唐關名

柔條之杪兮低垂和風之起兮舒遲極柔而動搖斯易  
至和而音響則遺習習兮使人順以翼也嫋嫋兮不紊  
默而識之風自南而薰條可結如線氣引容裔色搖蔥  
猜穆若無聞蠢然可見中林靜拂寧喧許子之瓢圓葉  
孤翻似動班姬之扇霽景相煦芳塵共飛條冉冉以順  
動風徐徐而表微蕩弱質以婀娜視之若有播清飈之  
溥暢聽之則希觀其谷興隧出匪徐匪疾彼條暢而無



聲信木訥而可匹此焉表瑞既偶聖於萬年於以應期  
恒不違於五日荏苒虛徐條風相於將墜而復舉若卷  
而還舒契彼無言靜入桃蹊之上示諸有德潛來草偃  
之餘細影中糅浮光上透示諸扇其微和豈將摧其獨  
秀諧清淨之理助發生之候風如以諷俾聖教以無私  
條若以調配樂和而不奏飄以長逝脩然遂多煦大塊  
而爰發泛柔木而惟和髣髴兮還同轉蕙寂寥兮無撓  
靜柯道合知微時方太古嫻其長而輕颺含其和而不

吐暗起軍營之柳取象於銜枚潛飄清廟之松同和於  
土鼓彼化鵬搏於九萬此至人御於十五與夫不明之  
道兮曾何足數

風不鳴條賦

以天下和平  
則如此為韻

唐陳章

風之起兮不觸而行條之應兮有動無聲察微祥於生  
植表靜理於承平輕搖而曉露初滴暗裊而春鳩轉鳴  
入楊園而若舞拂花逕而如迎寂兮冥兮自南自北其  
去莫止其來可測方縈仙樹萬年之影稍垂爰報聖時

五日之期不忒長養資於皇化沉潛契乎玄德似有心  
於松柏之內上下依依類無言於桃李之間往來默默  
嫩葉隨轉柔荑共舒颺絲光於空際惹絮影於春餘聽  
莫得聞訝繁柯之蔑爾視之不見驚疊萼之攢如倏自  
邇而通遐俄起彼而集此順八方之候若有若無調四  
序之宜時止則止由是輕纔偃草細不揚波異秋吟之  
摧木同卷扇於微和均習習之容寧比夫空穴而至絕  
蕭蕭之響誰謂其高臺則多散漫千林翱翔九野修通

匪亂於疾徐溥暢必齊其高下含其光也亦類於人焉  
靜以化之乃符於王者片塵靡驚於厚地羣籟皆息於  
晴天對翩翩之鷗鳥任嘒嘒之鳴蟬感之深殊桂鳴於  
秦樹害乎物鄙未偃於周田我國家化將時茂德與風  
傳佇見傾梧之後棲儀鳳於君前

快哉此風賦

有序

宋蘇軾

時與吳彥律舒堯文鄭彥能各賦兩韻子瞻作第一第  
五韻占風字為韻餘皆不錄

賢者之樂快哉此風雖庶民之不共眷佳客以攸同穆  
如其來既偃小人之德颯然而至豈獨大王之雄若夫  
鷁退宋都之上雲飛泗水之湄寥寥南郭怒號於萬竅  
颯颯東海鼓舞於四維固以陋晉人一呖之小笑玉川  
兩腋之卑野馬爭飛搏羽毛而汗漫應龍所處作鱗甲  
以參差

東風解凍賦

以立春之日永  
凍銷釋為韻

唐 韋 充

三陽布萬物新攝提建月勾芒御辰惟東風之解凍明

下土而知春於是嗣木德游水濱圻洄互開瀹淪始自  
震而發跡終習坎而成仁原夫其始也出大塊乘新律  
度晴川經暖日積習習之淑氣散莪莪之素質順流而  
委想銀河之漸傾逐吹以分訝瑤池之漸失飄然既至  
颯爾攸興潛融積溜暗斷輕冰自太簇之氣生功因入  
律悅中流而瓦解聲若裂繒不疾不徐如考如擊動輕  
漸於皎潔上游鱗於磧礫未分蘋末疑馮夷之剖蚌胎  
稍辨波心若荆山之流玉液意同攻陷勢若剗剔何虎

嘯之威方徵信狐疑之心已釋羊角既止蟬翼潛銷表  
一歲發生之候當三春啓蟄之朝鼓怒斯至徘徊遽飄  
圓折之時初疑破鏡亂流之處盡若迴潮斯以見寒暑  
不憊推遷屢急何一氣之自噫信百川而皆及導仁為  
煦決滯之義則深以德而和陷堅之功斯立當其晴流  
漸泮麗景初馳飄忽既及凝滯無遺狀曉河雲卷之初  
忽其明矣若太素氣分之際難可辨之是知天地既春  
欣榮者衆將以遂於羣性不獨釋於積凍然後驅飛廉

命義仲俾風日之可遊冀臨川而必中

南風之薰賦

以悅人阜財生  
物咸遂為韻

唐張正元

昔者南風和醇明德維新創五法而配夏感萬物以如  
春不然者變何以得為典樂舜何以尊為聖人者哉其  
風乃周流遐裔蕩滌庶物廓宇宙以澄清屏腐餘之伊  
鬱故表太平之至理卑寰宇之無拂也且順而隨時曰  
巽氣之相感曰咸合之寧間於幽林曠野散之何啻乎  
萬壑千巖當其南正司辰朱明應節我風在德何以驗



乎枯桑我風在仁何必候於空穴物既斯悅薰不在乎  
器人奚以欽物莫能同葉不在乎蘭人何以結知執德  
不回嘉祥有開始斯人之解愠修儀鳳以員來有孚顒  
若至德休哉足以成天下之務畜天下之財今國家以  
義為利知風之自實皇猷之穆穆因皇道之易易竹帛  
之功斯在絲桐之音不墜夫如是未有靈瑞之不臻生  
成之不遂者也寧與夫蓬振塵驚颼颼淒清或敗物者  
有墜或中人而喪精未若我皇內協正德外和厚生在

乎野而草自偃入乎林而條不鳴是則良哉元首克洽  
九有仰南風兮何翕爾而純和幸得詠時康與俗阜

南風之薰賦

以悅人阜財生  
物咸遂為韻

唐 吳仲舒

歌南風之薰兮肇自前烈美凱風以時兮流乎俊哲澹  
澹蕩蕩生乎無間馥馥微微播於有截故功成作樂而  
上下昭著治定制禮而君臣有別吾亦乘日月之至明  
致中和之令節言而履之萬國稱慶動而法之千察胥  
悅此所謂規模帝舜慰洽吾人操五絃之琴而八風從

律徵三代之樂而六氣平均使天下霈然而有感窮海  
外颯爾而知春至於傳之永久垂之不朽可以動萌芽  
可以榮林藪薰風之有德也使國富以人安薰風之有  
惠也使時和而俗阜若乃燠佳氣兮允塞埽祥烟兮乍  
開早綻青門之柳先驚上苑之梅晦入陽春之曲潛吹  
玉管之灰此亦韶年之麗景況有順時而豐財或披襟  
而乍對或臨水而輕拂承長養則芳氣襲於一人闡煦  
嫗則膏露霑於萬物斯以發號施令前規後監三農以

之協洽兆人以之無咸如此則典禮備麟鳳至吾道不  
樂兮發身有時薰風自南兮萬物咸遂物本無情因時  
而生百姓日用而不覺五音歲兆於未萌儻高颺之借  
便順下風而長鳴

南風之薰賦

以悅人阜財生  
物咸遂為韻

唐李夷亮

時之和兮道之至披南風兮舒以肆發於地鼓萬物以  
生成登於天叶三光而能粹豈不以律有度而感應樂  
無聲而大備郁郁也從四氣之攸分熙熙然見羣芳之

已遂若乃涉維夏背芳晨烝人已乂率土惟淳雲物必  
書識烟霞之改舊君臣有禮知動植之懷仁符玄化越  
洪鈞式觀風於我后終解慍於吾人伊昔虞帝君臨憂  
勞是切將納隍為已任垂大訓於前烈援琴寫操知庶  
政之惟和負展居尊俾含生之是悅然後澤及幽巖九  
區克咸氣揚湮鬱四海無拂且攸敘於彛倫故無遺於  
一物國家敬授惟明稽古作程式宣其和以厚其生是  
以東作之勤不遺於帝力南風之詠屢起於皇情疊疊

多士茫茫萬有猶偃草而咸若沐薰風之自久惟德斯  
碩惟財孔阜

南風之薰賦

以悅人阜財生  
物咸遂為韻

唐李叔

至矣哉如天之君聲明化溥穆南端而作樂播薰風以  
養人順聖時而和則氣無留慝解吾氓之愠故物無不  
親所以應乎品類遍乎天地感一德而當陽處八方之  
正位使夫微者必扇幽者必遂不以動而有光和而能  
至風之始也日月貞明星辰齊平然後蕩蕩而起熙熙

而生觸類而煦然長育無朕而潛來備盈行而有孚倚  
五絃而調四氣廣而不費匝九垓而周八紘非比夫抵  
華葉陵高城轉叢蕙而渥彩合萬籟而成聲者也風之  
達也本於元首播於羣有使五福富昌萬物殷阜宜其  
叶無為之大化匪獨草有苗之小醜亦有廣莫北動閭  
闔東來不如自其南而奄器一其薰而阜財則知端拱  
垂黻化人無拂則必合其君資其物豈惟三國不監二  
叔不咸徒偃其禾而表其讒故我君烈烈行道有截歌

祖德而庶事用康諧舜樂而鳴琴不撤被南風之溥暢  
慰遠黎之胥悅士有欲搏風於九霄希假勢於一挈

涼風至賦

以律變新秋肅  
然遂起為韻

唐王 綽

龍火西流涼風報秋屆肅殺而金方氣勁奪赫曦而朱  
夏威收五夜潛生聞桂枝而騷屑千門溥至覺玉宇以  
颼颼於時北斗杓移西郊禮畢葦收行少昊之令夷則  
代林鍾之律颯爾斯風生乎是日俄而撤鬱蒸揚慘慄  
減庭草以芳靡掠林梢而聲疾繇是淅瀝晴景浸淫暮



天起蘋葉而有準應葭反而罔憊無近無遠淒然凜然  
倏搖曳於紅梁潛催歸燕乍離披於碧樹漸息鳴蟬然  
後埽蕩千山蕭條萬里飄爽氣以極目厲秋聲而盈耳  
恨添壯士朝晴而易水寒生愁殺騷人落日而洞庭波  
起但遠戍烟薄遙村杵頻磨玉蟾而月色初瑩泛瑤瑟  
而商絃乍新虛檻清泠頗愜開襟之子衡門淒緊偏驚  
無褐之人北牖閒眠西園夜宴紅蕖將碧蕙香減珍簟  
與纖絺色變張翰庭前暗度正憶鱸魚班姬帳下爰來

已悲紈扇故得苦霧晨卷蒸雲晝銷望裏而林端嫋嫋  
夢餘而牕外蕭蕭悄絲管於上宮陳娥翠斂颭簷楹於  
華省潘鬢霜凋既而冷遍中原陰生兌位幾人離避暑  
之所何處軫悲秋之思雖令蛩響東壁鴻辭邊地又安  
得吹賦客而促征車自是功名之未遂

秋風賦

宋張耒

張子夕坐於堂之南軒有風颯然來自西方感乎人心  
異於尋常初披偃乎草木亦泛動乎軒牕張子曰是風

也所以成歲而佐陽者乎時也朱火就謝七月始涼既  
道迎於肅殺又紹介於雪霜其中人也入竅灑然汗澤  
為乾纖絺魯縞不勝其單其加物也未敗其形先傷其  
情未隕其生先奪其英使之嗒然委者見於顏色黎然  
槁者動於聲音吾恐中夜而聽之淅瀝颼颼羣動百蟲  
怨泣悲吟感人沖沖者秋之聲旦起而望之清明高潔  
者秋之容於是庶草效實九穀獻功既獮於野又嘗於  
宗感天時之不留念歲序之將窮張子曰吾何為乎戒

裘褐以備嚴冬而已

風過簫賦

以無為斯化有感潛應為韻

唐范傳正

風為氣兮溥暢簫在物而虛受何相會於自然合無情  
於妙有泠泠斯韻習習占久如聞松蓋之巔寧比土囊  
之口颯爾而至鏘然輒隨響纔度已俄遠聲成文而不  
虧其虛其實是可披襟而納以條以暢何煩鼓腹之吹  
彼孔雀下降鳳凰來儀雖見美於格物豈不慚於有為  
彼簫之韻惟風所借或激越於清曉或淒涼於永夜寂

冥之內爰生不考之音希夷之間是合不言而化謂越  
客乍流其遺響謂秦女遥度其仙駕散彼寥夔復於沉  
潛被治國之風以安以樂在敬心所感乃直乃廉動有  
輕重應無洪纖解慍且和可並鼓琴之唱不姦而順亦  
其從律之占若乃察其所感蓋有符於玄漠豈惟契於  
閑澹籟之所之智之所知誠萬殊之舛錯終一貫而逶  
迤風從虎兮飄忽簫象鳳兮參差何體異之如彼而音  
同之若斯豈不以宮商所合唱和為稱類霜鐘之暗叩

同灰管之潛應時然後起風匪躁求激而乃揚簫為靜  
勝彼鈞天之音聿蛩洞庭之樂虛無豈比風簫之感召  
亦由律呂之相須異搜奇於蔡笛鄙濫吹於齊竽徵顏  
成南郭之言浩然難究擬宋玉王褒之賦庶或同塗

風過簫賦

以無為斯化有  
感潛應為韻

唐  
夏方慶

風之過兮一氣之作簫之應也衆音以殊雖高下以異  
響終合散而同塗體宮商而自得韻清濁以相須動必  
造適用當其無宜然理順昭與道俱以由一人之化為

而不有萬物之心以虛為受帝於何力各自遂其生成  
天且不言乃能恒於悠久觀夫指大塊之噫氣裁衆管  
而聲隨始颺颺兮清越終杳杳以逶迤遠而聆之初疑  
白虎方嘯近而察也旋驚丹鳳來儀知化本之有朕見  
天籟之在斯道固無名物罔不感彼命宮而商應信陽  
舒而陰慘雲何事而從龍水何情而習坎故達人作用  
而虛清其心大道不疵乃滌其玄覽之風也扇其輕重  
之簫也應以洪纖彼若疾而飄我則以號以噉彼若和

而靜我則若沉若潛曷異夫暴心感而麤以厲敬心感而直以廉爾其斷續清空蕭寥永夜歷虛無而輕颺自遠拂松竹而幽韻相借微聞闕下伴金奏之發天庭迴徹雲中疑笙簫之隨羽駕莊生託之以齊物子綦由是而觀化化之至矣茲焉可知風乃不私其用簫亦自得其宜玄元立言事無事我后垂拱為無為君子曰風簫也罔不爭其善勝契不言而自應是將觀彼以化成豈獨因之而比興



瞽者告協風賦

以審音靜專修職知候為韻

唐王起

瞽惟審聲風實應候候至而厥風肇扇聲和而有瞽斯  
奏知夫天道則清泠必聞揚于王庭亦威儀可究所以  
贊欽若明敬授先五日而可傳信三推而不謬於時凜  
冽方謝溫仁始宣雜蔥龍之佳氣和郁靄之祥烟樂師  
乃告平野臨大田其視則惟昧其聽則惟專寧體於舞  
松之間得其煦嫗傾耳於偃草之際宣彼暄妍曰此融  
風將聞於天既而進退匪徐周旋可則逶迤於紫殿之

下俯僂於丹墀之側豈無相於偃偃方鞠躬而翼翼迺  
進而言曰陛下以美利利四海以仁宥宥萬國調玉燭  
而設邦教法銅渾而立人極所以八風不姦六律無忒  
臣以樂吏之賤謬知君子之德先王所寶惟穀所大惟  
食必俟協風以候力穡順時而教導蓋國之章有聲而  
薦聞乃臣之職今者起幽谷拂平林蕭條注耳寂寞拂  
襟有薰兮動地之氣無颯然鳴條之音達勾萌其和以  
布庠錢鏐其儀可尋且兢兢懍懍是微臣音之審習習

颶風彰陛下德之修固宜答休徵乘麗景躬千畝率萬井諒神倉之委積則齊宮之清淨表聖時之成若昭國典之思永皇上垂拱無為居高聽卑察邇言悅矇眊之告咨故實敦稼穡之宜謀盛禮度宏規豈號公之言是則是效而周王之代不識不知

颶風賦

宋蘇軾

仲冬之夕客有叩門指雲物而告予曰海氛甚惡非祲非祥斷霓飲海而北指赤雲夾日而南翔此颶之漸也

子盍備之語未卒庭戶肅然槁葉蔌蔌驚鳥疾呼怖獸  
辟易忽野馬之決驟矯退飛之六鷁襲土囊之暴怒掠  
衆竅之叱吸予乃入室而坐斂衽變色客曰未也此颶  
之先驅爾少焉排戶破牖隕瓦擗屋礮擊巨石搔拔喬  
木勢翻渤澥響振坤軸疑屏翳之赫怒執陽侯而將戮  
鼓千尺之濤瀾襄百仞之陵谷吞泥沙於一卷落崩崖  
於再觸列萬馬而並騫會千車而爭逐虎豹警駭鯨鯢  
奔蹙類鉅鹿之戰殷聲呼而動地似昆陽之役舉百萬

於一覆予亦為之股慄毛聳索氣側足夜拊榻而九徒  
晝命龜而三卜蓋三日而後息也父老來啗酒漿羅列  
勞來僮僕懼定而說理草木之既偃葺軒檻之已折補  
茅茨之罅漏塞牆垣之頽缺已而山林寂然海波不興  
動者自止鳴者自停湛天宇之蒼蒼流孤月之熒熒忽  
悟且歎莫知所營嗚呼小大出於相形憂喜因於所遇  
昔之飄然若為巨邪吹萬不同果足怖邪蟻之緣也噓  
則墜蚋之集也呵則舉夫噓呵不足以振物而施之二

蟲則甚懼鵬水擊而三千搏扶搖而九萬彼視吾之惴  
慄亦爾汝之相筦均大塊之噫氣奚巨細之足辨陋耳  
目之不廣為外物之所變且夫萬象起滅衆怪耀眩來  
髣髴於過目視空中之飛電則向之所謂可懼者實邪  
虛耶惜吾知之晚也

風異賦

有序

宋梅堯臣

庚辰歲三月丙子天大風壬午詔出郡縣繫獄死罪以  
下夫風者天地之氣也猶人之呼噓喘吸豈常哉若應

人事之變則余不知故賦其大略云

吾因迂勞適於郊憩亭舍日昃時羣輩外囂曰火來火  
來嗟呼噫戲出屋遠望西北之陲亘天接地混混赫赫  
不見端倪逡巡則赤埃赭霧突盪奔馳陽精失色白晝  
如晦號空吼穴揚砂走塊衆心驚惶廣衢翳昧莫辨誰  
何執手相對其少頃也稍明故歸人未寧兮相與而為  
隊順前者措足之不暇逆進者舉武而愈退睇山川兮  
安陳趨城郭兮安在所可視者五六步之內越翼日四

方恬霽乾坤黠慘物色憔悴牛復馬還絕銜鼻草靡木  
折莢實墜禽鳥墮死泥滿喙几案傾敝塵覆器民廬毀  
壞商車顛躓既而衆曰此何景也伺彼往來兮問遠邇  
之所自或曰起浚都播許鄭歷洛汭以及唐鄧漢隋之  
地稽厥時厥狀無與此土異未迨旬浹德音遐暨是知  
本聞之不偽聊綴辭也若此言變咎則非愚者之能議

風穴賦

有序

明王尚絅

聞風氣之為天地之號令也必五行得令四時順序而



後八方之風各應律而至以成歲功否則變怪百出不  
可具狀然有正有變皆氣之為也而汝州獨有穴又有  
所謂風伯者主之故又有風伯廟春祈秋報祀饗靡闕  
而風時為虐余惑焉感而賦之其辭曰

倚嵩陽之二室兮瞻鶴路於隆中鬱鳴皋以西園兮汝  
海灝以流東倦余游之倥偬兮聊偃息於風穴忱恒卦  
之未解兮捫余腸之百折俯千峯之白雲兮憶釣臺之  
天樂謝箕頴之鳴瓢兮媿龍山之帽落藉吹噓於鼓簫

兮歷千古而互見判正變於洪鈞兮本一氣之流轉肇  
醇樸於三皇之世兮煦雍熙於帝畿濯三王之清秋兮  
慘五霸之淒淒入虞弦以拔周木兮縱烈火於狂秦憫  
七國之擾擾兮歌豐沛於真人懲奸雄之狐媚兮烘一  
炬於長江吹灘上之一絲兮繫九鼎於漢邦揚沙石於  
昆陽兮結河水於王郎繫昔日之休休兮將誰復於爾  
傷奮噫氣之餘烈兮雜氛颺於羣籟粵余今之侘傺兮  
念誰為之否泰惟風伯之巍巍兮殿廟貌之凌雲惟歲

序之迭遷兮供祀事之孔殷迂之以鸞乘兮御之以龍  
輶左櫟剛鬣兮右薦柔毛酌桂酒之芬烈兮錯水陸之  
飫飽坐以享余之報兮一不聽余之所禱發土囊之先  
聲兮驅天末之長飈初習習以出谷兮寢汹汹以怒號  
飄忽鼓盪刺以撞兮溟滂瀕湧撼以揚兮騰走石於層  
空歟埃沙於萬里伐巨木如朽葦兮海水為之沸起泣  
羈旅之逐客兮阻京洛之征人方大火之如燬兮醕雲  
雷而為屯涸農家之跂望兮鑠霖雨於垂成怖雞犬之

狔猶兮又鷓鴣之無聲園林胡以萎兮嘉穀無實而空  
長唢願願以歔歔兮盡溘死以流亡視纍纍之足畫兮  
孰知謠咏之足哀將卒歲之何依兮望丘壑而徘徊朝  
遺田之百畝兮夕頽垣之百堵顧何賴於谷中兮乃隨  
山而鑿戶掩涕淚以攜幼兮雖未飽而娛懷究窮民之  
無知兮嗟何罪於風霾亶此穴之為厲兮何非余之前  
聞詠周南之遺風兮爰遵道於汝墳倚撫景以傷心兮  
徒意遠而無旁惜衆卉以搖落兮幸荃蕙其猶芳嗚呼

已焉哉甘馬革於櫪下卧牛衣於溝中跼微詞以伸志  
悲遠遊之回風亂曰雨暘時若兮風伯之司旱魃為虐  
兮匪伯之為暍爾風伯兮何庸何尤曰祈與報兮薦爾  
春秋天高難頌兮民隱叵說安得帝怒兮爰塞此穴庶  
幾羣動兮其獲銷歇

相風賦

有序

晉張華

太史候部有相風在西城上而作者弗為豈以其託處  
幽閒違衆特立無羽毛之飾而丹漆不為之容乎

蓋在先聖道濟生人擬論天地錯綜明神在璿璣以齊  
七政象渾儀於陶鈞考古旁於六氣仰貞觀於三辰爰  
在保章世序其職辨風候方必立唯極循物致用器不  
假飾眇修幹之迢迢凌高墉而莖植玄鳥偏其增翬晞  
雲霄而矯翼嘉創制之窮理諒器淺而事深步元氣於  
尋木寄先識於茲禽既在高而思危又戒險而自箴雖  
迴易之無常終守正而不淫永格立以彌世志淹滯而  
愈新超無返而特存差偶景而為鄰

相風賦

晉潘岳

混元恍其初判二氣變而無窮動靡微而不兆象有始而必終思先天而不違立成器以相風棲靈鳥於帝庭似月離乎紫宮飛輕羽於竿杪若鸞翔乎雲中廣莫興而習坎景風發而遡離闔闔揚而西指明庶起而東移

相風賦

晉孫楚

伊聖皇之高烈美治道之穆清兼乾坤之普覆齊三光之明明猶恭己以勞謙迄日昃而不寧慮聽政之有闕

誠禍福於無形建殊才於辰極樹相風於紫庭爾乃神  
獸盤其根靈鳥據其顛羽族翩翩飄羅其側翔風蕭聊出  
其間

相風賦

晉 陶侃

乃有相風之為形也終日九征桀然特立不邪不傾擬  
雲閣以秀出晞峻嶺於層城直南端以基趾雙崇巍之  
嶢嶢象建木於都廣邈不羣而獨榮朴雖小而不巨何  
物鮮而功大眇翩翩以高翔象離鵠於雲際擢孤莖而



特挺若芙蓉於水裔若乃華蓋警乘奉引先驅豹飾在  
後歲蕤清路百條允則彰我皇度

雷電賦

晉顧凱之

太極紛綸元氣澄練陰陽相薄為雷為電是以宣尼敬  
威忽變夫其聲無定響光不恒照砰訇輪轉倏閃羅曜  
若乃太陰下淪少陽初升蟄蟲將啓動靈先應殷殷徐  
振不激不馮林鍾統節溽暑烟煴星月不朗衣裳若焚  
爾乃清風前颭蕩濁流塵豐隆破響列缺開雲當時倦

容廓焉清新豈直驚安竦寐乃以暢情悟神天怒將凌  
赤電先發窺巖四照映流雙絕雷電赫以驚衡山海磕  
其崩裂

雷賦

晉  
李  
顥

伊青陽之肇化兮陶萬殊於天壤結鬱蒸而成雷兮鼓  
訇稜之逸響若乃駭氣奔激震響交搏瀆淪隱鱗崩騰  
磊落來無轍跡去無阡陌君子恐懼而修省聖人因象  
以制作

雷賦

晉夏侯湛

伊朱明之季節兮暑燠赫以盛興扶桑煒以揚燎兮雷  
火煜以南升大明黯其潛曜兮天地鬱以同蒸掣丹靈  
之皓琰兮奮迅雷之崇崇馳壯音於天上兮激駁響於  
地中徒觀其霰電之所種鑿火石之所燒鑠雲雨之所  
澆沃流潦之所淹濯當衝則摧破遇披則纖溺山陵為  
之崩盪羣生為之震辟是以大聖變於烈風小雅庸於  
天高嗟乾坤之神祇兮信靈化之誕昭故先王之制刑

擬雷霆於征伐恢文德以經化兮耀武義以崇烈苟不  
合於大象兮焉濟道以成哲

雷賦

唐  
張仲甫

粵若稽古太始之初陰陽和而為炭天地張而為爐鎔  
鑄品類陶冶清虛名之四海謂之八區陰陽相盪感成  
雷乎號曰天地之鼓事載河圖之書藏冰以時則響出  
而不震仲秋之月必聲隱而無餘或震怒百里雨潤同  
沾法威形於牧宰察醜惡於毫纖或殷鑠而鼓作或滅

沒而韜潛吼若天開闢如地裂動靜必以其時喜怒於  
焉有節是以樊重入室王裒遶墓終不苟於瑕疵冀中  
平於朗寤蠻裔於是膽懾賢豪於是心懼惡不戒而潛  
至善乃全而焉措無貴無賤敬天之怒五星不逆六氣  
合度發陽和啓蟄戶農事興作秋成斯覩以日繫時有  
倫有序歟焉而來倏焉而去鼓踴莫測其蹤安息莫知  
其所搜獲山川洗滌寰宇爾其為狀也則乃聯鼓囂囂  
力士雄雄雲飛電耀起自震宮其為聲也磊磊落落砰

砰訇訇龍潛魚躍海湧山傾星宿為之霾翳日月為之  
昏暝夫其赫震耀紛紜煽作臨峻崖投深壑終不騁  
於雄豪將勸善而懲惡布雲雨於潛龍銜丹書於白雀  
若乃王綱如繩籠羅有情是謂小人無禮君子無刑守  
容貌而無恒豈耳目之不明終冀貞廉於衆口法令未  
若於雷霆

春雷賦

以符珍紀元天  
地作解為韻

唐樊珣

惟聖作又先天授人惟天輔德啓聖無親故我皇齊七

政協三辰化孚大麓道暢經綸是以慶集天寶祥開地  
珍法威刑於震耀效生植於陽春鴻名既增睿厯伊始  
當渙汗之初發聽春雷之肇起將克宣陽罔忒時紀導  
達萬萌震驚百里南山望遠乘雨氣而方來長門聽深  
象車聲而未已若降在下如飛在天鬱重電而虺虺殷  
高棟以闐闐作解羣物揚靈上玄啓春和於蟄戶兆農  
慶於豐年若乃勢猛陵空聲雄出地形未遷而必肅政  
不戒而潛至渾渾其象含四氣於一朝號號其威警千

官於庶位及夫蒼蔚云卷烟埃稍廓餘雲既稀厲響不作攄殘怒於平野轉輕音於峻閣來雖莫制必先戒而後臻去則何言知勸善而懲惡是故知聖人御氣立極居貞體元災攘不令祉降攸繁豈與夫震廟為凶方知展氏之隱電災莫禦乃訊申豐之言則有抱影窮居在陰向隅雖倚楹而有得終棄室以思濡進道則望深知己觀光而業謝冥符感雲雷之布澤思自達於通衢

雷在地中賦

以復其見天地之心為韻

唐滕邁



雷動而息地卑而深當嚴凝之戒節向博厚以潛音順  
靜於時乃退藏而默處反本乎土乍響絕而聲沉豈獨  
敏震驚於坤德抑亦彰休復於天心原其辭滿盈止奮  
肆混然無朕寂兮深閤解威鄰於蟄戶銷聲處夫陰位  
足可以善列缺之歸功見玄冥之內事以是細觀其所  
廣徵其類初疑罷轉石遠積南山之陽又若駐奔車深  
掩長門之地象則存矣理難求焉沖融將凝互暗息隱  
轉與涇洛潛連道尚處幽奚爽下安於土功存作解終

期上奮於天足使至人將齊其默默楚客絕想夫填填  
苟有託其厚載亦無辭於小畜駭氣結乎土囊迅音止  
夫坤軸斯可以驗啓閉分寒燠不失動靜乃順之於時  
將體行藏故受之以復未萌響像詎可求思勿以潛雖  
伏矣是當薄言震之一陽之氣始生孰能輕動百里之  
音未發吾非後時自然居善閉之中因積風所扇且冥  
以斯在豈迅烈而遽變觀秋毫之末者無慙聽而不聞  
寫鼓鐘之音者空歎視而不見若夫玄律云暮衆彙淒

其苟未離乎坎窞且自理於希夷不然先王何以取象  
大易於焉立辭至矣哉法雷而行教也弛張之義在茲

初雷啓蟄賦

唐謝觀

蟄處於冬雷生自震啓一聲於春候知萬類之奮迅  
虺初動祁祁始振首出庶物為陰陽號令之端有開必  
先作天地發生之信原夫飛走各志羣分處陰既不難  
以不竦尚聲銷而影沉及夫勾芒御辰夾鍾應律整雲  
師布露之澤迫和氏春分之日溫風載扇重陰四密動

豐隆之大聲發昆蟲之暗室跂行喙息聞闐闐而鼓舞  
爭馳𧢲振翼鳴隨競競而雷同競出隱蔽雖久騰揚有  
期變軒轟而作矣俱引領以從之見羣生嚮風之義知  
六鈞播物之時是則感之於彼而乃乘之在茲且遂隱  
隱以起予各僣僣而挺爾穴處者聆之而厲志泥蟠者  
聞斯而舉趾均發萬品非唯百里各騰聲實驚出谷而  
載飛競逐明時范彈冠而思起搖車效之而可也聚蚊  
因之而有以然後舍彼即此違陰就陽角脩奮迅羽翼

弛張殷南山之粗厲啓出地之潛藏似桴鼓之纔終戈  
鋌熠熠如擊石之止後鳥獸蹢躅有若衆彙居蒙一呼  
而告羣生未覺一言以導曾無震寢之虞誰有擊臺之  
暴於是桃吐其秀鷹化為鳩助發生之德省囹圄之囚  
潛匿假之而振拔毛介因斯而處休大哉震元利拯羣  
生而出幽

霹靂賦

唐張鼎

殷其雷在南山之隈黑蜨翔雲暗天起黃雀驚風動地

來飄忽兮霏烟驛霧拂樓臺慘烈兮飛砂走礫揚塵埃  
波濤翻而海水激樹拔根而山石摧於是陰陽交戰晦  
明相賊或擊或馳乍通乍塞望騰蛇之上下見飛龍之  
南北電光開而山澤紅雨氣合而原野黑威聲奮擊於  
霄漢逸響振動於都國而乃隱軫徘徊謂高天壓而泰  
山頽鼓怒發洩謂厚地震而梁木折聲之所射者向無  
不碎氣之所奔者中無不絕值石則片片冰開當樹則  
重重瓦裂其為始也則赫赫奕奕若烈風猛火之燎崑

崙其為終也砰砰轟轟若決水轉石之潰龍門擬戰鼓  
則三軍亂擊方戎車則百兩齊奔川岳為之搖蕩天地  
為之晝昏豈直聞之者掩耳而奪氣見之者瞑目而埋  
魂若斯而已哉觀其沸鬱氤氲騰波磊落輝光之所倏  
閃聲氣之所噴薄豈在微而應必有感而作擊齊堂也  
識孝婦之懷冤震魯廟也哂佞臣之隱惡故導風伯從  
雨師以豐隆為號令以列缺為鞭笞洪涯飛霆以瀝液  
奔源走沫以流赭迫鯨鯢使蹭蹬怛蛟螭使躩踞鼃鼃

喪明於竈穴鱸鮓失路於庭墀當此時也別有跡履姦  
慝事兼狂狷想人孽之無逃慮天災之有譴各憂心而  
股慄咸戢驚而肉戰雖重華順之而不恚宣尼驚之而  
不變若乃依仁游藝之伍含道養性之流心且靜而神  
逸名既揚而行修通人倚柱而坦蕩孝子遶墓而思柔  
苟有言而寡悔夫何懼而何憂亂曰我何憂兮憂天怒  
豈不欲往兮為多露我有懼兮懼天威豈不欲往兮露  
未晞素履直載時道善肥我而可作吾與同歸



火賦

晉潘尼

覽天人之至周嘉火德之為貴含太陽之靈暉體淳剛  
之正氣先聖仰觀通神悟靈窮物盡數研幾至精形生  
於未兆聲發於無象尋之不得其根聽之不聞其響來  
則莫見其跡去則不知其往似大道之未離而元氣之  
灝養故能博贍羣物資育萬類盛而不暴施而不費其  
變無方其用不匱鑽燧造火陶冶羣形協和五味革變  
羶腥酒醴烹飪於斯獲成爾乃狄牙典膳百品既陳和

羹酋醅旨酒釀醇烹鼉煮鼉灼龜臙鱗若乃流金化石  
鑠鐵融銅造制戎器以戒不恭砥鍊兵械整飾軍容四  
海康乂邊境無寇韜弓戢劍解甲釋冑銷鐔為耒鑄戈  
為耨戰士反於耕農戎馬放于外廐及至焚野燎原陸  
火赫曦林木摧拉沙磧並糜騰光絕覽雲散霓披遂及  
衝風激揚炎光奔逸玄烟四合雲蒸霧萃山陵為之崩  
弛川澤為之涌沸去若風驅疾如電逝紛綸紆轉倏忽  
橫厲蕭條長空野無子遺無隰不灰無垌不斃震響達

乎八冥流光燭乎四裔榛蕪既除九野謚清蕩枝瘁於  
凜秋候來春而改生其揚聲發怒則雷電之威也明照  
遠鑒則日月之暉也甄陶品物則造化之制也濟育羣  
生則天地之惠也是以聖人擬火以制禮鄭僑擬猛  
以立政功用闢乎古今勲績著乎百姓

御定歷代賦彙卷七